



Chamna Am

(A Monthly Organ of the Evangelical Synod Church)

Vol. XXXIV

No. 08

November, 2019



Synod Central Church (ESC) Lefunga, Tripura

2019
KUM
THUPI:

"THUOKHAT TAKIN TAI HITIU"
HEBRAI 12:1

Editor: Rev. T. Kamgin Gangte

Vol. XXXIV No. 08
November, 2019

Editorial Board

Chairman:

Upa Dr. L.S. Gangte, M.A. M.Phil.

Editor:

Rev. T. Kamgin Gangte, M.Th.

Asst. Editor-cum-Circulation Manager

Rev. Khaitinthang

Bible Study:

Pr. Khailalsiem M.Th.

Evan. Paukhomang B.D.

Contributing Editor:

Upa Paozalun BA

Rev. Khaigin BD

Rev. L.Sata B.Th.

Rev. Thangkhosemi M.Div.

Rev. T. Kampu M.Th.

Rev. Henkholien MBS

Miss Chinbawi MRE

Editor ana hite

1. Upa Lalkhogin	1986
2. Rev. Khaigin Gangte	1987-2005
3. Rev. Lamkawsat	2006-2013
4. Rev. Thangkhosemi	2014-2017

contents

- Editorial.....01
- 'Ginna' chuh 'Hinna' ahi02
- Ka kipak sek ngei ie!04
- Kisik hun akikhel thei hi06
- Kristien insung leh mobile phone08
- No. 4 hi bang ahim?11
- Thuokhat tak in tai hitiu14
- Thuokhatna15
- Tuma leh Tulai25
- Mission Column-November27
- Akuila leh Priskila te chanchin30

- Kumkhat lakman Rs. 150/-
- Thusuoh nuom nei te'n ESC Office Post Box-54, Chiengkawnpang, Churachandpur a thak ding.
- Ala nuom leh a man pie nuom te'n circulation Manager, hetsak ding.
- Thukisuo cheng hi ESC Ngaihdan ahi vek kel puoi. Article zikte'n a mawh a kipuok chiet ui.

CHAMNA AW PHUNGVUKNA DING

1. Chief Patron	-	₹ 5000.00
2. Patron Member	-	₹ 4000.00
3. Diamond Member	-	₹ 3000.00
4. Gold Member	-	₹ 2000.00
5. Silver Member	-	₹ 1000.00

PRINTED AT
THAWSAUAU PRINTING WORKS
CENTRAL LAMKA

Editorial

Aw LALPA kawmah kipahthu gên unla; amah chuh a pha ngâla: A zahngaihna chuh I chung u ah a nasa ngâla; (Ps. 118: 1) Zie ziek chun ahi, “Nang ipmu hak inla mithi laka pat tho in, tichun Krista chun hun salhvâk in a,” ti a gêna a um khah, (Eph. 5:14).



Kum le bei ding ahi ta a, khawvel le akinawh ta a, khuti vengvung laka hi khawsa I hih ziek uhin Pathien phatna hi I hêtngilh khâk ding uhi lauh a um mahmah hi. Pathien a pha a, I chung u ah a zahngâi a tuni tienga hi dam a kum tawp kâi thei ding I hiu hi tih hi hêtngilh loh ding ahi. Khawvel hi a sawt deuh deuh, mihing hinkhuo hile I ngaihtuoh leh adam sun te a dingin hun hi a sawt deuh deuh, a hak deuh deuh. Tawbang hinkhuo leh tawbang hun haw hi mang zing I hih ziek un, zie haw laka chu ei siemtu I Pathien hi hengilh lo a muzing ding in I Bible in ei til zing ahi. Tuni a hi buoina leh haksatna kâla lênga ipmu zing ding in I Pathien in ei ti puo a, zie haw laka chu khanglo a, khawdâk a pilkieu a khawthe ngâi ding in ei ti ahi.

Pathien hing nei, Pathien hing suonga khawsa te I hiu a, vângphat lam I kichan leh vângpha mahmah te I hîu ui. Zie ziek chun, zie a I vângphatnau haw hi mawkmaia liem mang mai lo ding in I belh uh Pathien in ei umpih hen la. Chun, Pathien umpih zing ka hi, tih hengilh lo a hinkhuo mang ding leh mangzêl ding in deihsakna I kipiektoh uhi thil pawimawh te laka khat ahi zing hi. A langkhat ah I Pathien uhi, Pathien thikthusie, pathien dang I belh ding uh tiza mahmah zieng khat hikît ahi. Chun, a lungnatna hile a huosie mahmah zieng a, aziek chuh, I Pathien uhi mi kâktum nuom mei ahi ngal a, (Heb. 12: 29) Zieziek chun a zahngaihna huong sunga I um läi uhi hawmthawh tak in hun mang hitiu.

“GINNA” CHUH “HINNA” AHI (John 3:16; 5:24; 6:40)

By S. Lalpee
Tangnuom

Chanchinpha hi chieh viel a gen theilo ka hih ziekin, Chamna Aw manga khat vei gen ka ut a, hunpha ei pie Lalpa lopina chang masa hen!

Awle, ziea thu ka hun suoh hi mawk sim zienglo in, nang “Ginna” chuh bang tawbang ginna ahim? Ana ki enchien a limet a mang dingin ka hun ngen hi.

Thumapui: Ginna kitu chuh mit a muh loh hetchienna apat a ahi mawng hi, a um mawng hi, ahi ngeinai tih a pawm ngamna leh kingak ngamna hi ahi.

I changtel uh I sim leh chapa ginchak hi kum sawt hinna ahi tih ahi a, a gingchalo chuh kum sawt thihna ahi tih I muu a.

Aleh tun “Ginna” hi vak sut leu hin, agin a ginchak mai hi le pawm theih ahipuo. *Jakob 2,9*, thitha ten le a gingchau a akiling ui. Amau hinle Isu chuh a gingchau a, a lau mahmah ui tih I muu a.

Mark 3:11, “Thitha buokte’n le amah a muh tieng u leh, a ma ah a bawkkhup u a, “Nang, Pathien Chapa chuh na hi,” ti’n a kiko sek u a.”

Matthew 8:29, “Chun, ngai tie, amau chun, “Isu, nang Pathien chapa, nang leh kei u nih in banga kitihmatna I neih uh? a hun maa ei sugimthei dinga taka hi hung na him?” tin a kiko u a.”

Awle, thitha ten le Isu Pathien chapa ahi tih a gingchau, a lauh le a lau ua. Aleh amau hi kumsawt hinna a chang ding u? Changlo hiel ding. Bangziek in e? Aziek chuh ginna chuh thumatna leh nasep in azuih ding ahi. Amau ginna hi hetna maia a gin uh ahi a ziechuh “GINNA THI” ahi. (Atinglo)

Chun, kum sawt hinna khan Ginna chuh “AHING” (ATING) ahih ding ahi. Jakob 2:20-21, “Aw mi manloh pa, thilhiah tello a taksanna chuh bangmah ahi puoi tih na he nuom hi? I puu Abraham chun a chapa Isak maichâm chunga a piek lai khan, thilhiah ziekin thiem a chang hilo maw?”

Awle, Ginna Thi leh Ahing het baihna pen chuh nasep in a zuih or thu awihnan a zui sek hi. Kum sawt a hinna dingin Ginna ziek a thumat ngai ahi.

Rome 4:16, “Thutiem chuh ginna a kinga ahi a, zieziekchun, thutiem chuh Abraham leh a suonte dinga thil thawnpiek a ngaih ahi a, Dan thupiek zuite mai hilo in, Abraham guola ginchakna neite chengcheng dingin le a hung hi ta ahi. Abraham chuh I bawn chau a dingin thagau lama I pau ahung hi tai.”

Johan 14:21, I sim leh achien mahmah hi. A thupiek zawplo a/ zuilo a amah ka hehpih hi I tih uchun lepchieh hiding I hiu hi. 1 Johan 2:4 le en in. Awle, thupiek le mawk ngaih thah mai theih ei puoi. Zieziek chun kumsawt hinna dinga Ginna hing chimtak nei a thupiek zawp a, A nasem a na kingaih lai in na ginna chuh en chien in, a kikhelh man.

Chapa I ginchakna ziek un nasep in sulang hiting un thupiek zawp hiting un, nasep in sulang hiting un, thupiek zawp hiting un, Ginna hing tawh akawm zuon a, hinna I channa ding un, a thu neitu Lalpa'n ei malsawm ta hen.

KA KIPAK SEK NGEI IE!

- Upa Dr. L.S. Gangte

Mihihing in phunchiekna ding Ieh lung-awihlohnna ding I hawl leh kitasamlo ding ahi. Mithiem I muhleh ei thiemloh kihe, mihausa I muh leh ei chatgah kihe mi hawih I muh leh ei hawihloh kihe, michate chitzie I muh leh ei chaten a phakloh zieu kihe. Mi mopha I muh Ieh ei a khutilo tih ding umzel, mi In hawih Inpha I muh eh ei a hawihlo kisa, mi chaten a nu apa thu a ngaih zieu I het leh ei a khutilo, mi paten azi a lungsiet dan leh mi nuten a pasal phat zie a gen u leh ei a khutilo, mi insung kituok zie I hetleh awhchak um kisa, zie a kigen khalo tamtak haw zieka hi lung-awih loh theihna atam hi.

Mahleh I gel beksekloh kipahna ding tamtak aum hi. Thilchuom chuom ah kipaklo in um mahleu hing I kipah zing theihna ding un I taksa chung chang vak ngaihtuoh hitlu.

- 1) Zingtho thei a I um a damtaka khawvak I muh theih thu ah.
- 2) Zan khawvaka mit kisinga I mit thim den taleh kilawm khuo mukit theia I um thu ah.
- 3) Zun thathei, daileng thei, pau thei, gen thei a umna thu ah. Malai a I melhetsa haw hetdawk leh het naklai theihna thu ah. I khut leh keng mangthei a umna thu ah, muthei leh zathei a umna thu ah, taksa (tibak kimte dingin) kipahlohnna ding aum die?
- 4) Nethei, dawntheia umna thu ah Pathien vangsakna haw zieka kipak guolo a I chanloh cheng awtcha, vangsie kisak hi mahni kigawtna leh gimtheihna mai ahizawi.

Lung-awilo, kipaklo a umsangin vangsakna I chan haw hi khat khatin simleu hing dahna sanga kipahna tamzaw ngei ngei ding ahi. Bangtin lung-awilo leh kipaklo in umleu hing le Lalpa'n ei piekloh chun phachuom puon tin kuoma'n ei panpih thei diek puona. Mi kipak theite chu mi nuomsa ahi mai ui. I dinmun hi ei mau thua um aum puoi, ei siempa thu thu ahizawi. Hethiem chiet leu hing chu aw Lalpa lam ngatna'n kimang intin damlai paradise a um himai ding I hiu hi.

Pathien hin kuomah akhen chuom puoi. Mi hausa, michangah, mithiem leh mi mawlte dingin hun (time) kibang a pievek hi. Nikhat sunga zingkal, sun leh zan kibang in ei pie chieta bang tawbanga ching leh thiem te le chagahte sangin hun amang sawt thei diek puou a mi chenga dingin dakkal 24 piek I hivék ui.

Mithiem leh hausaten hun leh phat mangsau deuh u henla, chagah leh mimawlten mangchawm deuh leu chu ki-awih umpuontin khutichu ahiloh ziekin Pathien in deihchuom aneipuoi chan kibang chiet in ei enkawl ui tih akilang hi.

Ka hihtheihloh, ka sukla mdang theihloh cheng Lalpa'n ei hihsak sek haw hi ka gel tieng leh ka kipaksek ngei ie. Lalpa chungah ka lung a awi hi.

Damlo a ka um in damna ei piea, nelo, dawnloa ka um ding ei phal puoha, gawt muna ka chieh ding ei phalpuoh a, kumsawt a ka hinna ding Lalpa Isun ei piea, a dang banga ka ngekbeh ding ka tia, phunchiekna ding um in ka hepuoha, zieziekchun Lalpa ah ka kipak sek hi.

Zeziekchun, Lalpa chuh bang kapie thuk die? Ka chung thu ah Lalpa limbawl in um zing leh ka nuom hi.

Ka gitlohma cheng ei ngaidama, ka thiemlohma ah thiem ei chansak a, a cha deihtak I ei pawmta a, a goluohpih ding a ei guot ziekin ka kipahna ka gen zo seng puoi.

KISIK HUN AKIKHEL THEI HI

- Upa Dr. L.S. Gangte

Mihingte hin hinkhuo damsung hi taksa damlai bangamang zing zieng thei dinga kingaihna aum thei hi. Mahleh haksatna, damlohnna leh buoina haw I mauatuok dinga ei ngak zing ahi. Damlaini liemzel hin hun tawpna lam zuon in ei pui zel ui tih het angai hi. Hinkhuo I mat dan uhi I hetthiem sek loh ziek un Mosi chun damlainite a siemthiem theihna ding Pathien kawmah angen hi (Sam 90:12) Amah hin mihing hinkhuo dengdel dan ahethiem mah mah hiding aibia, chitna lunggel neih lawh theihna dingin ana ngen hi.

Hinkbuo cbawmzie thu I Peter 1:24, Isai 40:68 leh Jakob 1:10-11 ah I muthei ui. Thihna hung tun ding I hetloh dan u chu Thugenpa 9:12 ah chientakin akimui. Kuoman a thih hun ding ahepuoi, tulai diek diek in thihna lungphawng phut atam tai. Damlo zalkhuna kuol ten le athih hun ding ahediek puoua, thi tei dinga akiginchak tieng ulele pautheilo, hopihtheihloh ahitasek ui. Zie hun chuleh kisik thei le hitalo, kisik leule bangmah semdawk theilo ahisek tau hi.

Kisik theih hun kikhel thei ahih hetna dingin Juda Iskariot leh mihausapa chanchin leh michagah Lazar thu ah akihethei hi. Thu hihkhiel Pathien deihloh lam bawla na kihet chun tuhin, tumah mah hin kisikin Lalpa kawmah ngaihdam ngen zieng in. Zie thu hi na sim lai ahihlele Lalpa kawmah thupha chawi in angaihdamna ngen ngal in, hun ngaidam dingin ahun ngak zing hi. Ngaihdam lah neilo leh ngaidam nuom zing Lalpa chu lunggil takin sam ziengin aw? Dan leh dan leh, zing leh ahim kal kit ahim leh tihiel kin. Dan leh tih hi Setan thepna ahi. Kisik manlo a na thagau gawtmuna puih a nawp zieka thepa um na hi. Pu Zawmpau la phuok - Khawvel Pathien tam mah lele tih laa

chang 3 naa” Beimang Pathien nunsepa chun a sepleh a kipahna pen chuh thagau gehena puihlut hi ahi, atii.

Zeziekchun, kisik manlo ngaihdam chanloh khak ding hi lauhum pen ahi. Gawtmuna umten le chatuon hun tawplo luoh untin, Lalpa ngaidamna changten le chatuon mang tan au.

Tuni tieng hin mi bangzah taphet hi kisik manloa ngaihdam changloa hinna chan aum ding u aw? Haksatna, dahna hun tawplo muna lut dingin Lalpa’n kuomah cha aphal puoi. Tuhin Lal Isu chu zuon ngal uo. Mahni ngaihdana niel niel chi ahipuoi. Nangmah thiem nakichan sangin Lalpa’n them hun chan leh na kipahna tawplo ding ahi.

Eimah them kichan hi atawpa lungkhamna ding mai ahi. Isun gilo a lungsiet kiti hi migilo kisikte a lungsiet hi tih na ahia, gilo kisiklo lungsiet tihna ei puoi. Tua lung na gel theih laitak hi KISIK HUN chu ahi.

Mihingte dinga hun pawimawh pen chu - ‘TU’ (Now) hi ahi. Hun chiehsa sapkit theihloh hun hung tung ding het theihloh ahi. Laphuok tun “Tukhel kumza nung leh khawiah na um dem” tu hi tel phat ahi. “Aw hun kikhelsak kin” tin ei hilh ui. Tuhun a baugmah ngaihsaklote hin ahun hetdawk tiengu leh hun kikhel tan tin VAIGEI TALUO TANA.

Hunpha mansak khela kisik ding aum puoi, “Miglo khat kisik vangm van mipi akipak ui”.

“TUHIN NA LUNGHEI INLA HUKDAM IN UM IN”



KRISTIEN INSUNG LEH MOBILE PHONE

Rev Dr Ellien Gangte

Gaml a taka namte a dingin melchikna takdawk intin, kâwl mawng tawpa umte chuh saisilit in sam in tin. Tichun, ngaitie, amau haw chuh chan-gang tak leh hât takin hung khawm un au. Isai 5:26. Pathien'in thiengau Isai mangin Phone a hung um ding hih kum 2700 masanga Ana genlawk ahi. Pathien'in Alexander Graham Bell mangin March 10, 1876 kum khan Telephone A siemdawk sak hi. Chun hun hung chieh zelin Motorola Researcher Martin Cooper lamkaihna'n April 3, 1973 kum in Cell Phone 'Mobile' siem dawk ana hii. Hun le nite chieh zelin khawvel mihiemte khantohna'n le ma asawn zel a, I pu I pa te'u khanga ana kimu khalo leh ana kimang khalo Mobile phone chuh tuhin milip in I khut u ah I ki chawih chiet tau hi. Zie hih khantohna matchâk

thil thak khat hungtung ahih ziekin thil kipah umtak ahi. Mahleh thilpha khat ahungtun leh aphalo khat in azui ngâl hi tih hih het ngilh loh di'n aphi. A ziek chuh zie Mobile phone hih apha lama imat leh a phatchuom dan gensên loh khawpa phachuom ahi a, a phalo lama mangte dinga le atawp umlo tuka mat theih ahi. Khawvel a thil um cheng hih a pha bukim tai tihding umlo ahi.

Damdawi zieng hile damtheihna dinga kisiem ahih vângin amatna ding bang tako I matloh leh thihna theih ahi kit hi. Thil him him chuh a mat ding dân I hetloh leh Insung buoina tieng atut thei bawk hi.

MOBILE PHATCHUOMNA: Tuma'n mun chouom a um I Insung mi, lawi le guolte tawh iki zâkmata chuh lehkathak ana hi mai hi. Zie chuh hun le alut sawt a, tha leh zung alut

kit bawk hi. Tu'n Mobile phone ahung um phet in kihom matna anuom mahmah ta a, tha le alut tawm a, hun le alut tawm tai. Thihni man ni lele Mobile phone hih thizin sam'in apang ta a, a navâk chuo'mah mah mai tai.

Gamdang a umte tawh ahun huna kihom matna dingin le aphachuom hi. Tuma'n foreign a umte tawh kizâkmat na dingin lehkha thâkna'n sum tamtak tak ina sêng ua, tun chuh paisa tawmchah sêng'in Facebook, WhatsApp leh messenger te mangin baihlam taka kihomat tuoh theih ahihna ban ah Video call banga mel kimutuoh a kihona le aum thei tai. Mobile ziekin khawvel pumpi hih khuo khat guolin I um thei tau hi. Sáp Englishté'n "Global Village" anatih tih uchuh atak ahung chang tai. Lehkha pawimawh, Inmun patta, lo mun patta leh adang dang haw kawihtupna a mattheih ahi bawk hi. Etsakna'n In chuh mei in kavâm talele 'Kawihlutna Bawm' drop box khata I na kawihlut man poh leh Khawlthuoknei manga, avel a siemthak 'print' dawkkit theih

ahi. Mun chenga Chanchinbu 'Newspaper' kimu theilo ahih ziekin internet apata chanchin chuo'm chuo'm ettheih ahi tai. Mobile apatin Mek-vak 'Torch light', Sielkawp, Khuottuokna 'calculator' thugen, la sakte khumna 'record' aki bawl thei a, limlâk na'n amattheih a, SMS in thu akithâk thei a, hunbi dakkal hetna leh adang dangin a kimangthei hi.

MOBILE PHONE PHATLOH DAN: Mobile phone hih aphatchuo'mna tamtak um mahleh amangte'n I mat thiem loh uleh a sietna le tamtak aum kit hi. Zie haw chuh anuoi abang hin ana en hitiu; Insung mite kâl hihenla U-le-na'u kâl hilele chutkhawm a kiholimna ding hun aumthei puo a, a subuoi chuo'm mah mah hi. Mit asuchâu nasa mah mah hi. Mit hih ahatloh phat leh thil pawimawh leh nâlentak akisêm dawk thei sek ta puoi. Mobile phone a patin thu phalo, nungâk tangval nupi upa ki deihchâkna leh thânhuoina a tunsak thei hi. Eden huon a Evi khale theigah a et utna khan duhchâkna leh utchâkna ahun pie a, atawp a gitlohma mun hungtung ahi kha!!!

Ho-In leh kipawlkhawm na mun haw a phone call ahung khâk leh mipi lungthim asubuoi chuom mah mah a, khawlai lènna leh kihokhawm pêta mikhat in Mobile sawn zing/sik zing kawma mi aki hopih leh thâtdah aum a, taihsan vak ding lungthim ahung um dawk sek hi. Hetloh kâl in top-up leh internet pack thun na'n sum tamtak ana chieh ta seka, Inchên a sukha mah mah hi. Insung mi kim tak leh kitûp taka an nêkkhawm leh paucham khawmna haw hetman loh in ana subuoi mah mah hi.

Mobile phone recharge I bawl zing guola I thagau hinkhuo le pauchamna leh Bible sim in recharge ki bawl zing hitiu. Pauchamna leh Bible simzing chuh gitlohma tawh ki gamlatna theih lampi umsun chu ahi. Na chunga thil ka hih khelh lohma dingin, Na thu chuh ka lunggil ah ka khawlkhawm a. Sam 119 : 11. Mobile phone a virus alut leh mobile a kisûk sek puoi, thagau hinkhuo le pawlhcheh tak leh a thienglo aum chun I thagau leh I hinkhuo matdan himhim kiki pâk theilo ding ahi. A ziek chuh gitlohma tawh chêngkhawm kuomah akipâk aum puoi. Deihtakte, I sielepha hetnau in mawh ei chansak loh chun, Pathien lam ah I hangsan uh ahi. Johan 3 : 21.

Mobile phone online a I kawih zing guolin Pathien tawh kihona dingin I lungthim online in kawih zing hitiu. Thupha thu hawih kilak 'copy paste' I bawl sek guolun I diktatnau, I zaidawhnau leh I phatnau dang dang haw chuh midangte a di'n pie sawn zing hitiu. Mobile phone I Thah 'switch off' I bawl phat leh panna bei ahîh guolin I hinkhuo a beih ni leh neih-leh-lam, sum-leh-pai abawn a bangmah lo hiding ahitai. Zieziekchun I dampet hin I thil neih haw mobile phone nasan hih Pathien tawh mangkhawm dingin iki deihsak ui. Na thil neih te chun Lalpa chuh limbawla inla, na gah masa te chengcheng chun tawh. Thuchingte 3:9.

Tulai khantohna Mobile phone chawizing kawma Kristien Insung nuom tak siem dawk thei di'nga Lalpa vângsakna I chanuh I kideihsak ui.

NO. 4 HI BANG AHIM?

Rev. Khaitinthang

Tulai a I gam in a thuoklah leh insung tin cheng in I thuohlah leh I mi deih lai tamtak ten ana thihlawh tak uh No. 4 I tih u hih bang tia hung kipan leh banga hung pawt ahim tih neukhat ana en khawm hitiu.

Abul tak leh ahung kipatna hi, opium(kahni) tulai a gamtin leh milip in kisuonglahlo hiel a, nek muhna ding leh inchen na dinga I chin u hih ahung kipatna bul chuh ahi.

Atangpin zie opium (kahni) chingte hin, September tha leh achinna ding mun hi suthieng in amu(seed) hi a theh sek ui. Zie chuh hung khanglien in atangpin ahawihna leh a hawihloh in a puo a, khenkhat chuh fit 3/4 tieng in akung hi asang zo hi. Apak hih et mawitak ahi a, agah hi aktui tieh apha a, ahawih diekna achun vatawt tui tieh bang le aphazo hi. Anai hi atung in abuong a, ahung sawt deuh leh a hung san dang hi. Zie a nai kilakhawm te chuh kahni ti a I het uhi ahung hitai. Zie opium(kahni) apat chun morphine hi asiem dawk masa pen ui.

(1) Amasapen in, bel in tuiasuong ua, zie tui chuh alum hun tawk in kahni chuh a thak ua, hun sawtlo nung chun opium kahni chuh ahung tui a, zie phet chun damdawi chi khat hi a vak thak ua, a vak suon kit u chun bel tawlam achun ahung kitawltha a, kahni hawih cheng chu ahun kilap dawk hi.

(2) Zie chunglam a hung kilang opium (kahni) chuh thikkhe lien a suok dawk in, puon thieng tak in a thit thieng ua, zie a thit thieng u chuh bel dang khat in a huon kit ua, damdawi chikhat a vak thak kit u leh morphine I tih hi hung kisiem in bel tawlam achun a kie suk ta a, zie chu suokdawk kit in a thit thieng kit u leh morphine hi a hung hitai. Opium (kahni) kg. 10 apat in morphine kg. 1 a siem dawk theih a, No.4 hung pawt theihna ding in lam chuom chuom tam tak mai angai nalai a zie hi a tangpi chuh ahi.

No. 4 tieng atun theihna na dinga kalbi khat na chuh; Morphine kg. 10 leh acetic anhydride kg. 10 chawk hel in, kahpa thik, kahngbel in ahuon ua, asat lam 185 F. degree in dak kal 6 sung a huon zawh un diacetyl morphine ahung hitai. Ama'sangin ahawih zowntai.

Kalbi nihna; Diacetyl Morphine chu a thiengtho zawk na ding in tui leh chloroform hel in chawmkhat a dieh ua, zie chun a thienglo cheng chuh a chuom in a hung um a diacetylmorphine thiengtak chuh a hung suok tai.

Kalbi thumna; Diacetylmorphine chuh sodium carbonate tawh hel in a huon kit ua, zie chun heroin chuh ahung khal a bel taw achun akie suk ta a.

Kalbi lina; Morphine khal chu spirit tawh a huon kit ua, zie chun meiam ngawn in a huon ua, spirit hi kamai thei ahih ziek in ngaikham taka suon angai hi. Sawttak a suon nung u chun spirit cheng chuh tui hu'n a leng kangta a, zie chun heroin chuh a thit thieng zaw sem a, mahleh atawpna vang ei nai puoi. Heroin (No.3) atiu a, zie chuh sumkawlyei tamtak ten No.4 zuok in azuok ui, a zuoktu te chuh alawk mah mah ui.

Kalbi ngana; Achunga I vak gen u hi No. 4 phatak leh thiengtak apawt theihna dingin buoihpih angai nalai a, No.3 kha glass khawn lien tak ah spirit tawh a hel kit ua, ethyl leh hydrochloric leh acid tawh a chawk hel kit ua, khutichun awl awlin a hung kisiem fel ta a, zie phat chun No. 4 phatak ahung suok dawk tai.

Khawvel a heroin (No.4) theh dahl leh sumdawnna a nei te haw hi mi chuom chuom ahiu a, abul pen a akisiemna mun a valadawk masapen chuh Chiengkai Sheka, sepaik K.M.T te Burma, Shan gam a khuosa leh pawl chuom chuom te, South Vietnam gam a Prime Minister na tieng kigawl in zie sumdawnna hin ana pang ui.

China leh Laos, Thailand haw cheng le ana pang vek ui. Ziete haw chun, sakawl te haw mangin Thailand leh Vietnam kan in Hongkong tieng in apuolut ua, Hongkong apat in gam chuom chuom ah a hawm zak tau hi.

Tuni hun a I gennuom pen leh I het ding ua ka deih pen chuh, mi gam dang ten hun sawttak apan in ana ching tau a, 1805 vel apan in ana ching ua, ei gam ahin ahih leh chuh No.4 zieng hi chu 1982 vel apan khan ahung kithang dieka, aching zawngsak tam tak ana thizo tau hi.

Opium (kahni) hi tun I gam sung uah sum hawl biahlam na tin, I thingtang gam cheng ah I ching tau hi. Ahi, sum muh baihlam na leh inchen siem baihna chuh ahi phawt hi. No.4 siemna le I gam sung ah aum thei ta, I khangto tau hi. Tu khang ate hi khangto guol in lang leu hin le, khangthak te hi hung khag suk ding ahieu tih hengilh puoi tiu.

Simtu te cheng in leh zie aritcle sim cheng hin apahtloh dan leh, a chingte hi, mithisan aki vak leh Pathien melma I hiu tih kihengilh puoi tiu.

Lalpan ei vangsak chiet ta hen.

Ngetna

Chamna aw hi subscribe a, Articles a hun pie zing ding in leh subscriber ding hun hawla sponsor hun bawl zel ding in, chun aphung vukna ale pang dingin na tawmngaihnau leh deihsaknau Pathien min in ka hun ngen ui.

- Editorial Board

THUOKHAT TAK IN TAI HITIU

(Hebrai 12:1)

By: Rev. K. Siemlien

Zie khawvel a umding a, mihiem khata, Pathien in ei siemna ahin, bang apawimawh pen die, ti'n kikidawng taleh, dawn dan kibang vek lo maithei ahi. I ngaihkhawk leh deihdan kibang puontin, ahinla eimah ngaihdan a apha pen chuh hivek ding ahi. Ei siempa hin, deihna, thiltup khat nei a, ei siem chuh hingei in a. Apawimawhpen pen ding chuh, ei siempa deihdan leh thiltup chuh hetdawk a, zie chuh zuih a, sepdawk chuh hipen ding ahi. Ei uh mihiemte deihdan leh thiltup chuh abana hung hi chauh ding ahi. Pathien hih, vangsakna cheng cheng kipatna leh, a pie thei, mihiemte lungsiet a, hehpih pen thil bangkim, hihtheihloh neilo, hetloh neilo, abul leh atawp ahi tih I heu a, I gingcha tak tak lo uh ahim, I bel taktak puou a, A thu le I zui nuom tak

tak diek puou a, A vangsakna leh nawpsakna, kipahna I hawl zel ngal ua. I belh uleh kichien in bel in, I belh loh ua, Amah tihloh a, ei mau phasak dan, deihdan a hithei tho dinga I ngaihtuoh uleh kichien leh, acham laka, lum la lumlo, vawt la vawtlo hih sangin.

Khawvel hih buoina a dim ahi a; zie haw laka khawsa, gahsuoh tak, lawhting taka hinkhuo mat, kinemte I hih ziekun, thilpha mu a, mi lawhting leh gahsuoh I hih theihna dingun, thuokhatna apawimawh a, thil cheng cheng ah thuokhatna panglo in bangmah sepdawk a, lawhtitna ding umlo ahi. Mi lawhting I hih theihna ding ua, I ettawn ding un, mi lopi, mi hangsan tamtak, ettawn ding a um ua, amau haw mangin zillai vak lai tiu.

Paul: Paul chanchinpha zieka a thuokna: Suongkul ah,

kawkhuk thim lak ah, thilo chauh a kawih in a um hi. Mihiem thuok zawhloh ding, sawmthum leh kuo vei zepna, ngavei ana tuok hi. Zan ihmuth lohna tamtak vei ana tuok a, suonga sehna le tamtak vei ana tuok hi. Enghona, muhsitna, itthikna, zepna, muhdahna le tamtak vei ana tuok hi. Mahleh haksatna tawpkhawk mun a le a thuok tuntun a, a nasep chuh a haihsan diek puoh a, suonga seh a a umlai inle, chanchinpha gen, a sunzawm zel hi. Paul in, a muon Pathien a hechien a, A thutak Chanchinpha nasep, sem dingga Pathien in a guotna chuh a hechien a, a gingcha a, a kisuonpih zaw ahi. Gensietna, gawtna, sawisakna bang tieng tuok lele a lung akie puoh a, a hetchet bek ziekin a thuok zo a, a thuok muolsuoh zo ahi.

Tuhuna gingtute'n le, I ngaihtuoh thak ding ua deihum chuh, bangtiengin, Krista min ziekin I thuok tau em? Krista min zieka thuok ta te'n le, thuok tuntun a, thuokhat ding leh, a thuok kha nailote'n le, thuok khak ding lauh sangin, Krista min

leh chanchinpha zieka thuok thei dingin, panla leuhing ut aum mah mah hi. Nang ziekin, Chanchinpha, midangte kawm ah bang guola gensawn in aum tam? Thilpiek leh nasep dang dang haw ah, sem tam taluo ta guola kihe ahihloh leh thawhlawm a kidawl cheng leh, aphon a pang sek na him? Khatvei gen a, khatvei piek a, khatvei pang a, kichawl mai ding maw? Paul in kingainiem tak in chanchinpha nasepna a sunzawm zel a, amah kingaihkhawknna, mahni masielna sangin,thagau mangthaite a lainatna alien zaw a, thuok angaihna leh chan a ngaihna haw ah a buoi puoh a, a thuokhatna chauh hilo, a kingainiem a, midang (thagau mangthai) lainatna a nei a, Pathien in a guot, a sawl ahihna hechien in a ngaikhaw a, a lungkie lo ahi.

Tulai Kristiente hih, Krista min zieka thuok a, haksatna tuok a, thuok sangin mahni (comfort zone) nawpsak dan leh phasak dan tieng chauh a, Lalpa nasep a, haksatna thuok bek beklo a hinkhuo mat tum guo hileng un kilawm in, I um sau sau tau hi. Lalna, thuneihna,

lopina hinkhuo nusieh in, Isu'n a gen guol in, "Kuonle ei zuih a nawp chun, amah leh amah kihengilh in, nicheng in, amah Kross kiput in ei zui hen," a tih guol in, kingainiem in, hehpihna lungthim pu'n, Lalpa ei thupiek hechien in, bangtieng haksatna, thuokna ding um lele, thuokhat tak in, thuok tun tun in, thuok muolsuoh ding in, panthak lai tiu, kipahman tampi piek ding Lalpa'n ei tiem.

THUOKHATNA

Upa Kappa

Tukum I kum thupi article a hun siemdawk thei dinga damna leh phatpha ei pietu Lalpa Pathien kawmah kipahthu kagen masai.

Thuokhat takin kuol hitiu:

Ezekiel 4:4,5: Thiemgau Ezekiel kawmah na veilam pang delhin kuol inla, na chungah Isreal insung mite gitlohnau kawih ding ka hi. Khutia na kuol sung ni zah chuh a gitlohnau puo hin na tin. Kum khat gawtna a thawk sik un ni khat zel na kuol ding ahi.

Ni zathum leh ni sawmkuo (390) sung kuol dingin kaguet tangal a. Kuol khop gimtheih aum ding zie simtu nangin nahei. Thiemgau Ezekiel in Lalpa ni ziezah zozai chu kuol zopuong ka, tia suonlam siem theihna tamtak neimah leh Lalpa'n amite kawma thu piesawn dinga thiengau a apansak ahihna kitak takleh THUOKHAT taka pang ahihna ana asep Lalpan akipah pihding ziemai chuh awchak umpen ahi.

Sapchuom upa, Reverend, Pastor, Missionary, Sawlchakte hin Lalpa grape huon sunga isep na chiet uah, THUOKHAT takin sem muolsuoh chietleng chuh sapchuom sunga leh khuo le veng

sungah masawn loa bangti um theihding. Mi felte leh ginum tedin zawhna thu tiemsa ahi tih pahchakna la isak tieng uleh ei sukipak sek hilo mawh.

Ezekiel 4:6: Zie hi na sukbutin tieng leh, changlam pang delh in ni sawmli (40) sung kuol kit in na tin, Juda insung mite gitlohma cheng puo'n na tin, ni khat chuk kum khat tawh kituok zel dinga kahun guot sak nahi. Ni zathum leh ni sawmkuo (390) asuk buting zawha le ni sawmli (40) kuolkit zel nalai dinga a guotsak hih Lalpa aginna ngazo lote leh THUOKHAT taka lalna semlo te dingin hehpihna a dim Pathien ahi tih teitei ngap nading aum loh ding ziemai chuh. Hita mahleh Isu I taksannau siempa'n Matthai 19:26, ziechuh mihiem dingin hih guol eipuoi. Pathien dingin chuh bangkai hihtheih ahi tia ei thamuon kitna chungah. Jakob 1:4, Na thuokhat nauchun lamtin ah bukim takleh bangmah tasam loa naum theih na dingun, lawhsam loin ahun puihi tih heu in.

Isrealte leh Juda ten a gitloh ziek ua sukgiumtheih gawtna a thuok ngeingei dinguh amau sika thuok muolsuoh sak ngap Ezekiel thiengau a akineih khak uhuh gentheih loh khawpin a hamphau hi. Tuhun a lal nasem te laka Ezekiel tawbang i pien theih lohnau hih a ziek ka ngaihtuoh leh thuok muolsuoh ngap naleh chan ngamna ineih loh ziekuh ahipen hi.

I kum thupiu hin ei tawsawt mah mahin kipak um kasai. I Lalpau Isu a hehpihte puia ahung macheng kum thupi'n kinei maileh kati hielhi. Kuol hih chawlhdamna vakpen leh thuokgim thuok napen ahikita. Psalm 86:6, ka zalkhun chungah ka hun ngaihtuoha, zan ven chenga nang kahun gel laiin, mihingten lungkham mangbat na ituok tieng Lalpan chawlhdamna ding azan ei guotsak kuolna zalkhun chuh gimtheih thuokna lunggim na zalkhun ahi zaw seka. Ziechuh I mihing hihna diktak suklat nale ahi. Thiengau Ezekiel hin ziechan lawm lawm a kuol

sunghin phun nading thasiet nading genseng loh geldawk ina. Akama gendawk loa athuok muolsuoh mai hi thupetu Lalpa Pathien inle pakchan a e. Isu nungzuite'n Bible a imuh le I hette hi sukbutit vek dinga thupiek I hih uhi hengilh puoi tiu.

Thuokhat takin chui tiu:

11 Samuel 11:2, Leng inchung ah ava vak viela, inchung apat chun numei khat kisil chu avak mua, mi ava puihsaka, asiet lawh taa. 11 Samuel 12:12, Lalpa'n David kawmah, nangin a gukin nahiha kenchuh Isreal mipite chengcheng mitmuhin sunvak ah hih ingka tihsaka. Pathien chate tia kimin vawhten lunggaih gimtheihna ituok tiangleh ngawhding mundang ihawl vielsek na achu eiapat I kieng hungkit sek ahizawi. Thununna lawh ihihlam iki hesek puoi.

David gitloh kisik a pauchamna Psalm 51:4, na chungah, na chungmai chahah thil kahih khiela atihhi taksan naa pitingte kampau ahi. Khaileh ivak lakna ziekchu David chu a vaihawmna chutphah a achutding chan, abeihma cheng thuokhat tako chu hiethiet hileh a sietlawh nading vaki muhdawk puona.

Leng Nebuknezar vak enkit leng Daniel 4:29, zienung tha sawmle thanih chun, Leng Nebuknezar Babulon lengin chung achun avakviela, amah chun zie Babulon khuolopi tak hih keihatna ngei leh thilthihtheihna a kachenna dingleh ka lopi naleh kathupina suklatna dinga kasiem hilo ahim ti'n agena. Leng kam athupawt chuh abeihman van apat aw ahung gisuk ngala, nawhdawk in umin natin gamsate laka um in nation bawngchal guola hampa petding nahia. Nachung ah hun sagih bei ina. Chungnung penpa chun mihingte lalna gamah vaihawma adeihsak taphawt kawmah a piesek ahi tih nahet macheng ti'n Daitui chapchek in aum taa.

Insawng chungah mawk vakviel maimai dinga lenga pang hiloin Lalpa lalgam diktaka vaihawma thuokhat taka a thuneihna chutphah luohdinga guot ahihna a pawtsan ziekin kiuonna, chapona muhdawk gendawknan aneihlawh na chunagh Lalpa thikthusietna ava kimuhdawk lawhtak ziekin alenggam achan lawhtai. Ziemai chuh hiloin gamsate lakah bawngchal umdan akikawp pih tamai hi. Mihing adingin thawkhatna hih lawhtitna ahia, chapotaka pao uongna hih muhmasak loh nagam eitun thei ahi tih leng Nebuknezar mangin Lalpan ei sinsak ui.

Leng lopi tawp, ching tak alalna gamin simle mal dawttuoh zieng himahleh a chunga thiltung chenghii amah kihawl dawk ahi. Mihing dinga venbit haksa pen Bible a chuong hiel chuh I lei uhuh ahi. Um hiethiet theilo thihna gu adim vakzuol theihloh, a venbit theihna pen chuh igen dawkding gel tuok masakna dinga thuokhat taka panlak zingding ahi.

Jakob 1:26, Kuole sakhuo khawksa a kingai a, alei hupzo samlo amah kithem zaw chuh, ziepa sakhuo hodan chuh mawk mai ahi.

Thuokhat takin ding hitiu:

Ezekiel 2:1, Ezekiel kawmah mipling chapa nakeng in dingah, nakawma thu gending kahi. Akeng a dingtheilo te kawma thugen chuh aphan chuom lohding dan aziek gen angaise puoi.

1 Korinth 15:58, Zieziekchun, ka suohpih deihtakte, dettak in, suktawih zawh loh in, Lalpa na chu phachuomngai taka sem in um zingun; na sepgimnau chuh Lalpa achun a thawn ngei puoi tih na he ngal ua.

Amah keng ngei a thuokhat takleh det taka din pih zolo ten taksa nasep le a zawhloh mah bangin taksan cha thutak ahet leh amuh dinpih nadinga thuokhat na neilo ten, lalna a sep na ah gahsuoh ngei puona.

Rome 5:2, Lungsietna a idin detnau ahin, taksanna'n I lut taua. Labu ah dingdet un thudik din leng thupiek zawpa guol zozel ding in tih leh thutak na dinpih uchun nakawm ah umzel ina.

Galati 5:1, Ding det unla suok namkawl a chun tang kit takiu. Kuo sapchuom te laka le buoina umsek hih khawia hung kipan ahim tih ka khuolleh asiele pha hetkhenna adik a dinpih sanga maipha hawlna a mang zaw Pathien mina channgam neilo lal nasem dinga atin lohna amahle kihe mahmah apanmun thaahtha utlo te ziek hipen in kamui. A ngawl ziek a fel louh ziek hizaw loin.

Thilpha chiehto zelding deihna zieka ngaihtuoh khawmna a kiniel kinakna suoksek hih amihing te kido hilo in, thudik leh thudiklo kina ahi zawi. 1 Samuel 18:17, 1 Chronicle 5:22, 11 Chronicle 20:15, 1 Samuel 17:47. Gunchuh tako sima ngaihtuoh in lalpa kido na'n ngaithhei chiet taleng. Eliza kha Karmel tanga amah mai panga Baal thiempu zali leh sawmnga (450) tawh akiel na akhan, lawng loa dettaka dinga ahet leh amuh adinpih ngam ziekin zighthna achang hi tih muhle hete ihi ngal ua. Zie zighthna lopi tak khah ahatna a chitna athilhikhtheihna ziek hilo in Lalpa na asep naa athuokhat zieka anget na adawnga zighthna chang ahi. Thutak panpih in dettak in ding hitiu.

Thuokhat takin chieh hitiu:

Kenglam ngena tang gama khuolzin na ah itun guot na khuo chuh tun macheng chawl in lahten lengle tunzawh tei nading ah thuokhat taka chawlnga mailoa kal suonzer na chauh in eipui tung ina, tih ihet mah bangun. Vanmun lopi hehpihna gam tung dinga ginna leh sapum kithuoha kal isuon tuntun zing lai uhin a tawp masieh taksap gimtheih natna tincheng sawm puma chieh zel ding ihih nau mithieng Pawl in dahum tinchen thuok in pathien gama lut ding him ihiu hi, eitih sak ui.

Jakob 5:17, Khutichun, suohpihte, Lalpa hungkit masang sieh, thuokhat takin um un. Genesis 22:4, Chun nithum ni chun Abraham chu avak dak toa, amun chuh gamla takah avak galmuh a, Lalpa a ginna nga taktak ten Patepna a tuok haw hih ginna ngazo lote dingin simngam genngam guol eipoi. Chakhat chauh teknunga apiiek that a maicham halmang a pie dinga agen khum banginzingkal matakina athoa, thing a ek a, thingphel lawm chuh a chapa a putsaka, Lalpa guotsak namun Moriah tang azawt pih mai nathu hih tuhuna sapchuom lamkai kuote kawm ahima phut hileh ngawlpikh kham tingset ahi. Abraham in achapa Isak tawh Moriah tang tunpih nakham ting thuokhat na aneih ziekin ginna a pa hihna alawh zohi. Abraham dingin Pathien sapna changtak leh pateptak ginna nei ana hihna hih, Lalpa a ginna nga gamlo te dingin vangsiet na a ngaih hin ah. Ni thum hiel a chieh nunga le gamla taka avak gal muh phak hipan chauh ahihleh Moriah tang sanga lien zaw sangzaw gam kidawh na zawk tang dang ahawh malam uh um ngei intin. Mahleh Abraham in naupang sawm kawmkawma chieh ahih tawh agim achawl bek tak ziekin tang chengcheng hih Pathien siem vek ahi Pathien in eisawl lawh napen ka chapa chunga hih ka sukpitit phawtleh tin tangdang khat pohah maicham asiem zieng puoi, tih hi lal nasem chengin hezing hitiu. Lalpa guotsak namun chuh Moriah tang ahih ziekin.

Tuhun a chiehlai sapchuom te hin anom lamlam abaihlam lam, hiha lalna sep hih ikhan tuohna pen uh ahita maia. Zieh hih thuokhat takin do hitiu.

Johan 4:23, Pathien ho tak tak te'n, Thagau leh thutak in Pathien ho un au; Pa'n zie tawbang mi chuh amah ho dingin ahawl sek ahi. Matthai 16:24,25, Kuon le ei zuih a nawp leh, amah gimtheih khawksa lo in, a kross pu'n ei zui hen. Kuole ahinna humbit

nuom ta chun chan intin; kuole, kei zieka ahinnna chan tan hukhing ina. Tulai iki singsak dan utawh aki hah kahh chu o. Lawhtitna ding vangsa kna chan nading damtheihna ding ahin buoi ta lodingin kisa zo hitiu.

Thuokhat takin tai hitiu:

Taih hin mihing hihna a su thachawl vak pena. Mahleh thuokhat taka tai dingin Pathien a pata deihsa na change ihikit ua. Taihna ziek a chuom chieta a khawipen a chuh pang ding hileng le amasa pena hih ding eikawk muhchuh, ei sukawlawk tacheng leh gitloh eimau a bekchak umchuh mua paihtha masa lot chuh, thuokhat takin tai hitiu tihna guolsiek a pang theilo ding ahinhna alang chien masai.

Gingtu ten lei hinkhuo chawmcha ineh sung ua ginna a vangam zuona vanmi umchan thawh kawm kawma, itaih tuntun lai uhin. Isu itaksan nau siempa leh subukim pa lam chauh ena thuokhat taka taidinga thupiek ihiu chuh.Khawvel guolsiek chuh first, second ummah leh Pathien ngaihdamna a dim guolsiek vang chuh a khuti puoi. Isu mai ena itaih phawtleh vanmun lopi hehpih nagamah tailuta kipah manle sangna laidingin eitiem sak hi.

11 Timothe 2:5, Min guolsiek bawlmah lele dan guola abawl loh chun khuksak in aum ngei poi. Psalm 1:2, Adan chu sunle zanin angaihtuoh sekhi.

Genesis 19:17, Vansawlchak ten Lot kawmah, nahinna dingin taidawk ah. Atun macheng a ataih kawma asuk dikding thupiek nih apie a. Kinunghei kinla, phaicham mawng mawng ahinle ding hiel kinla tang lam akhun tai dawk ah. Zie thupiek chuh Lot te inkuon dinga piek ahi. A zi'n azawp loh ziekin lamkal ah chikhawn a suok ngal hi. Thupiek zawp Lot leh a chanu tenih

THUOKHAT taka taichuh guotsak natang ava tung ua, zie mun chu Zoar tih ahi. Taksan chate hile THUOKHAT taka itaih nau ahin itun maua hih ding ingah nasa khawp mai ua. Mahleh I thugin bu ah na thuok zawhloh dinguh thepna na chung u ah tunsak puongka tihleh thupiek haw chuh a giksak puoh ngala, tih eivak gen khumkit uhuh kipak aum chu aw.

THUOKHAT taka taih angaih na khat vakgen kitleng, Bus chiehhun huom dinga taih ahih loh leh thilpha khat ki hawpna adak kal huom dinga taih. 11 Timothe 4:7, Mithieng Paul in kaki taihsiek na chuh kazo ta a. Paul vangam zuona ginna a thuokhat taka ataih patna hih Syria khawpi Damaska khuo kawma Lalpa Isu vakin a khawh paiha akaih thawhkit apat a khuolzin tawptieng gei in thuokhat takin apang hi.

Eliza'n leng Jezebel laua ataih hi Pathien phasak pih ahih akilat na chuh van sawchakte nekding apieksak a, a chiehna dingmun ahilh pekhi. A hinna hukbit na dingin amah keng ngei mangin, Beersheba tunga achieh hih tulai a lalna sema tinle tak gunchuh kisa te dingin limet in mang hitiu. Gimle chawl hitantin Juniper thingbul nuoiah thihna angen hiel hi. A Kuola aipmu ta a Lalpan a vansawlchak khat changthak tangkhat leh tui um ava thaksak a, Eliza tho ah neh na chieh na ding agamlai, tungzo puon la. Ane a adawn a Pathien tang Horeb tiengin ni sawmli leh zan sawmli achieh a. Kawlpuk khatah aum ta a. Hehpihna adim Lalpan Eliza zietak ahih banghiih nahim atihsak zel nalai hi. Eliza muongtak in um inla kichawl damtah tihsak maileh kilawm, eihaw ngaihdan ah. Lal nasem te hih ithugen leh ithilbawl, min anek theih loh tiengleh, bangti dingin eiphus hi. Lalpan zietak ahih banghiih nahi atihsak hi.

Eliza chuh Lalpa lemtih a THUOKHAT taka ataih zel na ah amah sepban semding leh, amah sanga thagau aleh nih chang dinga tak

Shaphat chapa Elisha bawngchal a lo kailai ava muhdawk lawha apuon a silhsak hi.

Act 26:3, Mithieng Paul in Leng Agripa kawmah, THUOKHAT taka eina ngaihthak sak dingin kahun ngen hi. Ngaihthak na hinle thuokhat na tel lo in, atawp chan pan zawh eipuoi. Mihingte I chapo zie maichuh I ngaihdah deuh kamkhat chauh izak lele lungna zieng, I ngaihnawp loh chuh a git he lengle athu helo zieng. I zakdah kigen dingchu, aki gen ma ale ana lungna man chai ihih ziek un. Leng Agripa hile bangchom hipuon a. Ziezieka chu Paul in THUOKHAT taka ngaihthak sak ding a anget masak tawp ahi.

Gingtu diktak a kingai HO-IN a thugen a sawt deuh a, amah mi hihna asuk khak deuhleh athuokhat na beizieng. Ngaitha tum ngaplo zieng, ken sawt samah leng ka ngaihthak pih te adinga Lalpa'n mamawh asak zieka agen sawt sak ahi tihna zie helo.

Atawp na ah, Pathien thagau umpihna meipi um kimvel a um ihih kihea, ei sukawlawk chengleh, gitlouh eimau a bekchak I paihthak sateu ki delhphak sak talo dingin THUOKHAT takin tai hitiu.

Lalpa'n a thu simtute cheng adingin vangsak ta hen. Amen

TUMA LEH TULAI

- Tuma'n a gen tamte chuh miching a ahi a;
Tulai in a gen tam chuh mingawl ei tai.
- Tuma'n hun awng cheng luoh ziengte kha miching ahiu a;
Tulai hin mingawl tih ei tai.
- Tuma'n mun chenga panmun neite kha mifel a ngaih ahi a;
Tulai hin mi kisalah a ngaih ahi tai.
- Tuma'n mipilte'n ma a pui ua;
Tulai hin mi hausate'n ma a pui tau hi.
- Tuma'n Thagau mite'n Sapchuom a pui ua;
Tulai hin Politician te'n Sapchuom a pui tau hi.
- Tuma'n nulepate hi zah ahiu a;
Tulai hin thulak loh ahi tau hi.
- Tuma'n mi gitloh hilhgaih chuh mi deihsak ahi a;
Tulai hin mingawl a ngaih ahi.
- Tuma'n mi'n Pathien thu hi a hinpih ua;
Tulai hin kicheina'n mat ahi.
- Tuma'n mi'n Pathien thu hi a liengvaihpih ua;
Tulai hin a chapopih ui.

- Tuma'n Pathien thu hi mi'n a thihpih ua;
Tulai hin mi'n kivakna'n a nei tau hi.

- Tuma'n Pathien thu hi ngaihsan ahi a;
Tulai hin khawvel thu hi ngaihsa'n ahi.

- Tuma'n mi'n Pathien thu a gen sek ua;
Tulai hin mi'n amah chanchin a gen tau hi.

- Tuma'n Pathien nasep a gen sek ua;
Tulai hin amah nasep a gen zaw tau hi.

- Tuma'n Dan bawhsiete kha thiemloh a chang ua;
Tulai hin Dan bawhsiete hi thiem a chang tau hi.
- Tuma'n a negu thei chuh mingawl a ngaih ahieu a;
Tulai hin a negu thei lo chuh mingawl a ngaih ahi.

- Tuma'n guchate chuh suongkuol a khum ahieu a;
Tulai hin guchate chuh pahchak leh limbawl ahi tai.

- Tuma'n mi chansik laksakte kha gensiet ahieu a;
Tulai hin mi pahchak leh pakchavui awhsak ahi tau hi.

- Tuma'n mi gimtheite panpih ahieu a;
Tulai hin a chansik uh laksak ahi tau.

- Tuma'n Dan zuite thiem a chang ua;
Tulai hin dan zuilote thiem a chang tau hi.

- Tuma'n Pathien phatna hi gen ahi a;
Tulai hin mahni phatna gen ahi tai.

- Tuma'n Pathien pahchak ahi a;
Tulai hin mihiemte pahchak ahi tai.

 - Tuma'n Dan hi migilote awkna ding ahi a;
Tulai hin migilote suohchakna ahi tai.

 - Tuma'n Pathien in a mite a pui a;
Tulai hin mite'n Pathien a pui tau hi.
-

MISSION COLUMN – November

- 1. Missionary Supporter kibehlap to zel in, tuni (16.10.2019)**
tieng in mi 169 iting tau hi. Tuchung a hung pangthak hi Tv. Lamlalgou, Chiengkonpang ahi. Lalpa'n Missionary supporters cheng cheng athak in vangsak in umpih zel hen.

- 2. Ithing Ho Sat (tuong) sun zawh hita:** Synod HQ. Church in, Ithing mun ah Ho In kisa, chawlmai dinga umta, kei un SAT sung ing kau ahun tiu a, Rs 3 Lakhs ahun pieu a, zie mangcha chun, 25.09.2019 (Nilaini) Ni'n, Bunglon apat Khanglai 23 leh Synod HQ. Church apat Khanglai 35 chieh khawm in, a khuo neite tawh mi 80-90 kikal lak vel ding in Sat sunna neih ahi. Lalgam nasepna dinga isepkhawmna teu Lalpa'n ei vangsak zel ziek in kipak thu gen kawm in, zie Ho In hih sakzawh ahih theih ngeina ding in pauchamna'n delhzui zel hi tiu.

- 3. Tripura Mission Field adinga Central chuch hawn dawk hi ta:** Hunsawt tak Sapchuomte'n ina buoipih uh Lefunga mun ah 'Synod Central Church' September 14, 2019 (Saturday) ni'n

Rev. T. Kamgin, Executive Director in hawnna anei a, Rev. Letthang, Field Superintendent in a latna anei hi. Lawhting taka hawn dawk a aum tak ziek in Lalpa kawm ah kipak thu gen hitiu. Chun, zie Ho In hih Lalpa'n a mite a pawlna mun ahih zing theihna ding in pauchamna'n delhzui zel hitiu. Zie hun ahin, Pathien thuchah Rev. T. Kamgin in genna anei a, Ho In sakna a pan ana la Donors leh Sponsor te adinga vangngeksakna Pr. Khailalsiam, Dir. M&E, ESC in anei a, Building sakna a Finance Report Mr. Robindro Secretary, Building Committee apat report ngaihthakna neih ahi. Zie Ho In sakna ahin, Rs. 27,29,054/- lut a sak ahih thu het ahi. Vak hettheih khat chuh, zie Ho In hih Lefunga sung leh kimlehkieng vel adinga Ho In hawihpen a

tiemteh ahi. Lalpa lopina chang hen. Chun, Triupura Mission Field a ana semsa te, Pr. Mangneihlal leh Pr. Soilal te Inkuon inle zie hun hih ava uop ua, chuleh Langgol apat in Pu B. Khama te Nupan, Bunglon apat Pu Gouneu, , Langvon apat Pu Lalpu, Synod HQ. Church, Chiengkonpang apat, Upa Dongkhola, Pu K. Pauboi, leh Sangboi te'n le ava uop ui. Chuleh, Agartala KWS apat leh kim leh kienga sapchuom ten le ahung uop ua mi 300 val deuh kisukhawm in program nuomtak a mat ahi, program kichaih in kipakna Ankuong limtak mai sawk khawm ahi.

4. Doi mun ah Evangelist Quarter hawn hita: Lamphel Sapchuom leh Nu Mawikimte Inkuon in asak uh, Doi Para mun ah Evangelist Quarter saka um chuh 09/10/2019 (Nilaini) Ni'n Rev. Letthang in hawndawkna a nei a, Upa Th. Lala, Chairman, LCC Lamphel ESC in Pathien khut ah latna anei hi. Zie hun hin Pathien Thuchah genna Pr. Khailalsiam, Director M&E, ESC

hun amang a, Evan. Sachindra Debbarma, Care taker Doi ESC apat in, Finance Report ngaihthak ahi a, Lamphel apat a lawiupa hung te'n le tilkhohna thu genna anei ui. Lamphel apat hungte chuh Upa Th. Lala, Pu Sonpee, Pu Kenneth Shyama leh Pu Lamcha ahiu. Zie Quarter sakna ahin a kigawm in Rs 3,36,855/- alut hi. Program kichaih in Quarter lawpna Thingpi leh nektheih limtak mai dawnkhawm leh nekkhawm ahi. Lalpan Donors te vangsa zawm zel uhen. Zie In hih Lalpa'n a vangsaka asunga cheng te'n hatzaw sema Lalpa nasepna a panlak na mun ahih zing theihna ding in paucham pih zing hitiu.

5. Tripura Mission Field Workers Retreat lawhting taka zawh hita: Guona aum bang in, Tripura Mission Field a dinga Workers Retreat 08/10/2019 (Sepkitni) in Synod Central Church, Lefunga mun ah lawhting tak a matzawh ahi tai. Zie hun ahin, Pr. Khailalsiam, Director M&E, ESC, leh Pu Paubik, Secretary, CKKP te'n Seminar paper leh Pathien thuchah genna a nei ua, chuleh, thupawimawh chuom chuom genkhawm nah un nuom tak mat khawm ahi. Retreat in gah ahun suoha, semtute'n hatzaw sema pan ahun lak nau ahih theihna ding in paucham pih zing hitiu.

6. Jiribam Area Leadership Seminar zawh hita: Jiribam Area a dinga Leadership Seminar ana kiguon chuh lawhting tak in, 18/09/2019 (Nilaini) ni'n Jiribam ESC Ho In ah mat zawh ahi tai. Zie ni hin Phailien, Muolnuom leh Jiribam apat in Lawiupa 20 val hung khawm in, 9:00 am apat 3:00 pm tieng mat ahi. Resource Persons in Rev. T. Kamgin - Christian Leadership: Nehemiah, Pu S. Hentinlien – Church Finance, Pr. Mangneihlal -Leader's Personal Bible Study methods leh Pr. Khailalsiam -Church Doctrines & Missions thupite mang in seminar hun hawmthawh tak leh nuom tak a matkhawm ahi. Chun, zan in Phailien,

Muolnuom leh Jiribam a kikhen in sapchuom tawhthakna le ahung nei ngal ui. Seminar in gah ahun suoh zel theihna ding in paucham na'n delhzui zel hitiu.

AKUILA LEH PRISKILA TE CHANCHIN

By: Evan. Lamzagin

Lalpa ading a nupan ginum, ahangsan leh thagaumi Bible ahin a chanchin uh hi atam hiel puoha chuh, Sawlchak Paul in a ngaihnat mahmah leh apahchak mahmah mai, a chiehna lam chenga a puih viel sek ahi. Amau nupan hin chanchinpha ziekin ngawng tan tieng ngam in, Sawlchak Paul hi a kithuohpih zing uh ahi.

Bible a a chanchin uh kimuhna chu anuoi a haw hi ahi; Nasepte 18: 2-4, “Zie tak achun, Juda mi khat, a min Akuila kit a mu a, zie pa chuh Ponto gama pieng ahi a, Klaudias in Juda chengcheng Rome khuo apat pawtdawk ding thu a piek ziekin, a zi Prisilla tawh Itali gam apat hung tung pan phet ahiu. Paul chuh ziete kawm achun a chieh a, Chun, a kawm u achun a tung a, a nasep bang uh sem a hih ziekin amau chuh tawh a sem sek a, a nek muhnau chuh puon-In siem ahi. Chun, Chawljni cheng leh kikhawpna In achun guntak in thu a gen sek a, Judeate leh Grikte chuh thuzawh a guo hâm sek a.”

Amau nupan chanchin Bible ah ana en zel hi tiu. Nasepte 18:18-19, “Chun, zie nung chun, Paul chuh Korinth khuo achun ni sawttak a châm a, zie zawh chun, suohpihte chuh kampha'n a tha a, tak apat chuh Prisilla leh Akuila tawh Suria gam lam ah kuong in a chieh tau a. Paul chun thutiem a neih ziekin, Kenkria khuo apat a kitawl mau chun, a sama met a. Chun, Ephesi khuo chuh a tung u a, tak achun Prisilla leh Akuila chuh a nusieh ta a.”

Amau nupan hi Bible a a chanchin uh ana enzel hitiu: Rome 16:3-5, “Prisilla leh Akuila, Krista Isu a ka naseppih, ka hinna hûkbitna dinga ngâwng dawh phalte nih kha. Nei hun chibai sak un. Kei mai hilo in, Jentel sapchuom haw lawi chengcheng in le, a kawm u achun kipahthu a gen ui. A In u a sapchuom kikhawmhaw mah kha le ei hun chibai sak un.”

I Korinth 16:19, “Asia gama sapchuomte hin a hun chibai na hiu ui. Akuila leh Prisilla hin le, a In u a sapchuom kikhawmhaw hi tawh, Lalpa achun, chibai phapen a hun pieu hi.”

2 Timothy 4:19, “Prisilla leh Akuila, Onesphora inkawte kha tawh nei hun chibai sak in.”

Prisilla leh Akuila te nupan hi Rome khuo a Kristien masapen laka tel ahiu hi. AD 49 vel khan Kristiente chu Rome khuoa buoina siem tun a ngawh ziek un, Rome khuo a Lalpen Klaudias in a hun nawhdawk ahi. Amau nupan hi, Akuila hi pasal zaw ahi a, Prisilla hi a zi ahi. Nasepte 18:2 na en in. Akuila hi Ponte gam a pieng ahi a, Italy gam apat Rome khuo a hung chenglut pan ahiu a, Rome khuo apat a nawhdawk a aum phet in, Korinth khuo ah a cheng ua, puon inn mah bawl in aum ui. Korinth khuo a pat in Ephesi khuo ah apem kit ua, zietak achun Sawlchak Paul hitawh akipawl un, Chanchinpha na a semkhawm tau hi.

AD 55-56 vel in Rome Lalpen Klaudias a thih nungin Rome khuo lam ah akileh kit ui. Aumnau lamcheng u ah mite Isu Krista chanchin a hilh zel ui. Sawlchak Paul in Rome khuo a mithiengtho 27 chibai a thakna lak ah, Akuila te nupan hih amasapen in a pang ui. Amau nupan dinmun leh a hihnau apawimawh diek haw chuh Bible a I muh bang un, anuoai a hin ka hun sulang hi:

1. Sawlchak Paul a nasep ah akithuohpih zing ui. Chanchinpha genna hileh, puon inn bawlna hileh bang cheng ah akithuohpih zing ui. (Nasepte 18:3)

2. Isu Krista a ginchak ziek un, Paul hukdawkna dingin ngawng tan le angam ui. (Rome 16:3)
3. Amau hi pem vielviel ahiu a, khawitak ah cheng leu le Lalpa Isu tawh cheng khawm ahih ziek un, a inn u chuh sapchuomten kikhawpkhawmnan amang zel ui. Aziekchuh zie hun lai chun Biek-In chuom aneih nailoh ziek un. Sapchuomte kipawlkhawmna mun dingin, a inn uh apiedawk zing ui. (Rome 16:5)
4. Mi, Pathien thu hechien lote a hilh chien un, Pathien thudik akawkmuh zel ui, (Nasepte 18:24-28). Appolos chun Pathien thugen mitak ahi a, himahleh amah hin Pathien thu a hetchien loh ziekin, Johan baptisma thu chauh ahe ngal a, khuti chun Prisilla leh Akuila ten a thugen a zak un, a inn u ah a pui ua, a kawm ah Pathien lampi thudik zawdiek in a hilh chien tau hi.
5. Jentelten amau nupan kawm a hinle chibai thakin kipak thu agen ui. (Rome 16:4)

Zie nupan kituok tak mai te kawm ahin Paul in a tunga, nuom asa mahmah hi. Na a semkhawm ua, a naseppen u chun puon-in siem ahi. Akivaknau pen le ahi. Paul hin a zinsuk, a zintoh hin tunna leh gieknan amang zing hi. Awle, eile khuol I zin tieng u leh I tunna te aphat u chun, nuom I sa a, nichuong hiel le I ut sek ahi. “In a malzin lawp dan thiem ding hengilh kiu in. Khutibang phatna apat chun, a bangin, hetloh helin vânsâwlchâk tunsak a na hi kha thei sek uh ahi.” (Heb 13:2)

Pathien mite chun malzin bawlphat ding ahengilh kha puou hi. Prisilla leh Akuila te nupan hin malzin bawl dan hi a thiem mahmah ua, Paul leh Sapchuom pihten angainaui hi. A inn ubi tunna chauh hilo in, Pathien miten Pathien pakchak khawmnan amang sek ui.

Pathien thu/Chanchinpha hi hun a neih phawt u chun a gen zel ui. Amau nupan guola Chanchinpha gen dingin nang uh nupan le Lalpan ahun deih hi.

Lalpan a thu vangsak ta hen. _____

CHAMNA AW PATRON MEMBER LIST

CHIEF PATRONS:

1. Pu S. Paukholal	Chief of Bunglon	1994
2. Ebenezer Chapel	D. Phailien	2014
3. ESC Shillong	Shillong	2014
4. Mr. S.K. Juiliana	Lamphel	2014
5. Nk Sawmte K. Gangte	Fujairah, UAE	2015
6. Nk Esther Tinglamkim	Gangte Veng	2015
7. Pu Thangzago (K.Vawmcha)	Chiengkawmpang	2015
8. Langol ESC	Langol	2016
9. Mrs Hoisi W/o Laldawng K.Gangte	Jiribam	2016
10. Upa Letkam	Bunglon	2016
11. Pu (L) Kamgo K.Gangte	Phuolsanbung	2016
12. Shillong Local Missionary Board	Shillong	2016
13. Pu Lunkholal Gangte	New Delhi	2017
14. Pu Noksieki	New Lambulane	2018
15. Nemkhola	New Lambulane	2018
16. ESC Gangte Veng M&B	Gangte Veng	2018
17. Nk. Nancy Nemneihvak	Hill Town	2019
18. B. Lalven	Lamphel	2019

PATRON MEMBERS:

1. Pu Henkhojam	Siempat	1994
2. Sep. L. Gangte	5th Assam Regt.	2003
3. Dr. Lalzazdal	Chiengkawmpang	2004
4. Upa Niala	Shillong	2004
5. Pu P. Gangte	Shillong	2004
6. Pu B. Manga	Shillong	2004
7. Pu S.T. Gangte	Shillong	2004
8. Pu Lalkithang	Delhi	2004
9. Rev. Dr. Soson	Dimapur	2007
10. Rev. T. Kampu	Guwahati	2008
11. Pi Phalneihtiem	Dehradun	2008
12. Pu B.K. Gangte	Dehradun	2008
13. (L) Hengo	Chief of Chongmun	2010
14. Upa Dr. L.S. Gangte	Chiengkawmpang	2011
15. Pi Niengzalam	Chiengkawmpang	2011
16. Pu Sangvung	Chiengkwanpang	2011
17. Pu S.K. Gangte	Shillong	2011
18. Pu Lovejoy	Kohima	2013
19. Pu Goginthang	Shillong	2013
20. Pu L. Minlun Gangte	Shillong	2013
21. Pi Lalkim	Shillong	2013
22. Hav. H.L. Gangte	Shillong	2013
23. Ms. Grace Lalbiek	Guwahati	2013
24. Pu L. Neihsiel	Shillong	2013
25. Pu Lamtinlien	Shillong	2013
26. Pu S. Thienlaljoy,	SDO H.Q. Veng	2013
27. Pu L. Sawia	Gangte Veng	2013
28. (L) Lt. Col. L. Gangte	Chiengkawmpang	2013
29. (L) Upa K. Manga Gangte	Shillong	2013
30. Rev.Dr. Th. Lamboi Vaiphei	Hill Town	2015
31. Pu K. Pauboi Gangte	Chiengkawmpang	2015
32. Siemlaljoy	Lamphel	2016

DIAMOND MEMBER:

1. Upa Lamkhodem	Chiengkawmpang	2015
2. Mrs Felli	Chiengkawmpang	2015
3. Moizokim (Chloe)	Lamphel	2015
4. Pu Lame B. Gangte	Langol	2016

GOLD MEMBER:

1. Pi Niengneihechoi	New Delhi	2014
2. Agape Children Eng. Jr.H/S.	Ithing, Thanga	2016
3. Upa Th. Mangngul	Bunglon	2016
4. Pi Chawimawi	Lamphel	2017
5. Pastor Gouliennang & Family	Tripura	2018
6. Muntha ESC	Muntha	2018

SILVER MEMBER:

1. Pi Sailothangi Thangzom	Old Lambulane, Imphal	2014
2. Antioch High School Abicharan	Tripura	2014
3. Upa Thanglal	Bijang	2015
4. Upa Laitinthang	Gangpimul	2015
5. Lammeihhat	D. Phailien	2018
6. Pu Sonpee S. Thangzom	Lamphel, Imphal	2018
7. Pu P.L. Manga	Lailak, Mizoram	2018



SYNOD CENTRAL HAWNNA LEH LHTNA



*Published by Rev. T. Kongon on behalf of the Evangelical Synod Church
Printed at: THAWNSAU PRINTING WORKS, CENTRAL LAMKA.*

Alak man apat ₹
If undelivered pliz return to:
ESC SECRETARIAT,
Chiangkawnpang, Churachandpur,
Manipur - 795158

PIN

--	--	--	--	--